

# ABLI NGA SULAT PARA SA TANANG NEGROSANON



**YUTA, DUGO ug KINABUHI** sa mga mag-uuma ug mamumuo sa umahan nga gigapos sa mahimuslanong bayolenteng sistema sulod sa gatusan ka katuigan ang padayong gidaot. Ang kusganon nila nga panawagan para sa hustisya, kagawasan ug kalingkawasan naglanug-lanog sa isla ug sa tibuok Pilipinas.

Sukad sa pagmasaker sa siyam ka mag-uuma-mamumuo sa umahan sa Sagay City niadtong Oktubre 20, 2018 sa mga kamot sa pwersa sa Armed Forces of the Philippines (AFP) ug Philippine National Police (PNP), ang halapad, pinaka-wala'y kaluoy, dili maki-angayon ug mahimuslanon nga gu-

bat nagpakuyanap og ka-daut sa panginabuhian sa katawhan sa Negros; daghang Negrosanon ang napagan. Ang wala'y hunong nga pagdagayday sa dugo gikan sa kalawasan sa mga biktima sinyales sa umaabot nga kalisdanan.

Ang reaksyunaryong estado nga gidumalaan sa nag-

haring hut-ong sa mga dagkong kumprador ug agalong yutaan ug kasamtangang girepresentahan sa pasistang diktador nga si Rodrigo Duterte desidido sa pagpukan sa bugtong pwersang nakigbisog nga babag sa iyang pagpatuman og nasudnon nga balaod militar. Sa Negros, ang paggukod

(*crackdown*) sa dayag nga demokratikong kalihukan nakaab-ot og mas taas nga ang-ang human gigamit sa mga pwersa sa estado ang “kontra-insurhensiya” isip rason para i-reyd ang mga buhatan sa mga progresibong organisasyon ug panimalay sa mga giilang aktibista. Dugay nang napamatud-an nga ang pagpanglupig ug pasismo samtang nagsabwag og kahadlok ug kalisang naka-agni usab sa diwang makigbisugon sa katawhang Pilipino.

Wala kita’y laing padulongan kundili ang pag-isa sa bandera sa maki-angayon nga gubat sa katawhan! Kini mao lamang ang bugtong bandera sa atong kalingkawasan gikan sa gatusan ka tuig nga panamastamas! Kini ang pinakabantogang tahas sa katawhang Negrosanon aron ma-isugong dal-on paabante ang ilang pakigbisog para sa hustisya ug kagawasan.

Gipanganlan sa mga siyentistang pangkatilingban ang isla sa Negros isip nagbukal nga bulkang sosyal tungod sa hilabihang dili maki-angayon nga kahimtang sa ilang kinabuhi. Dinuyugan sa Joint Campaign Plan Kapangatagan sa AFP ug PNP, lakip na ang Executive Order 70 ug Memorandum Order 32 ug ang kahambogan sa AFP/PNP, ang umaabot nga pagbuto sa bulkan sosyal mapadayag sa gamhanan nga gubat sa katawhan isip kongkretong dagway sa kuyanap nga rebolusyonaryong pagsukol batok sa tumang pagpanlupig ug pagpanghimulos nga ilang gi-agwanta.

Ang nagharing hut-ong nga mga haciendero ug dagkong kumprador/magpatigayon ug ang ilang suluguon nga AFP/PNP sa isla nagpakita sa

ilang pinakamaharhari-ung pagpanlingla. Nagpaka-arong-ingnon nga nanawagan og kalinaw apan naglunsad sa wala’y kaluoy ug pinaka-brutal nga gubat; nga nipatay sa daghang mag-uuma ug mamumuo sa umahan, mga abugado ug lokal nga opisyal sa gobyerno nga ilang gidudahan nga nagsimpatiya sa maki-angayong kawsa sa rebolusyonaryong kalihukan.

Kinopya gikan sa ilang labaw ug agalon nga si Rodrigo Duterte, sila BGen. Eric Vinoya sa Joint Task Force – Negros ug 3rd Infantry Division sa Philippine Army; BGen. Benedict Arevalo ug Col. Noel Baluyan sa 303rd ug 302nd Brigade; ug si PBGen. Rene Pamuspusan ug PBGen. Valeriano de Leon, mga Regional Police Director sa Western ug Central Visayas ang mga nagharing despotikong suluguon ug ipokrito sa Negros!

Giduso nila ang localized peace talks, gipanghambog ang ilang dakong pondo para sa Enhanced Comprehensive Local Integration Program (E-CLIP) ug gidemanda ang pagsurender sa mga rebolusyonaryong pwersa apan wala’y gikuptan nga malahutayong solusyon sa mga ugat sa armadong komplikto! Ang localized peace talks wala nag-ila sa nasudnong kinaiya sa mga sosyo-ekonomiko ug pulitikanhong suliran nga giatubang sa katawhang Pilipinon.

Ang ilang bersyon sa kalinaw ang hingpit nga pagsurender sa mga rebolusyonaryong pwersa. Ilang gibasura ang burador sa Comprehensive Agreement on Socio-Economic Reforms (CASER) nga unang gihisgut sa niaging peace negotiating panels sa Gobyerno

Wala kita’y laing padulongan kundili ang pag-isa sa bandera sa maki-angayon nga gubat sa katawhan! Kini mao lamang ang bugtong bandera sa atong kalingkawasan gikan sa gatusan ka tuig nga panamastamas! Kini ang pinakabantogang tahas sa katawhang Negrosanon aron ma-isugong dal-on paabante ang ilang pakigbisog para sa hustisya ug kagawasan.



NOBYEMBRE 22, 2019

Nagapasalamat ang istap sa Ang Paghimakas sa mga kontribusyon nga nahimong madaugon kini nga isyu. Sa pagpalambo sa atong Ang Paghimakas, gilauman nga ang tanang mga tigbasa padayon nga motampo og mga balita, piktyur, istorya ug ubang pang mga sinulat. Nangayo kami sa inyong mga suhestyon ug komentaryo unsaon pa gyud kini mapalambo.



angpaghimakas@yahoo.com



facebook.com/ang.paghimakas.58



angpaghimakas.wordpress.com

sa Republika sa Pilipinas ug sa National Democratic Front of the Philippines (GRP-NDFP). Ang kaniadto Lt. Gen. Carlito Galvez nga sa kasamtangan Presidential Peace Adviser maoy nangulo sa GRP war panel. Sila arogante ug dili makatarunganon sa negosasyon pangkalinaw samtang gipangpamataw ang mga wala'y yutang mag-uuma ug mamumuo sa umahan; ug dayun ibasul ug ipahid ang pagpatay ngadto sa NPA ug gani bisan ngadto sa mga militante ug progresibong organisasyon! Dili hikalimtan sa kasaysayan ang mga tigpatay ug berdugo! Ang kawad-on sa yuta ug kagutom sa isla sa Negros nagkagrabe dinuyugan sa kawala'y kaluoy nga mga reaksyunaryong malupigon ug mapanamastamason lakip na ang ilang mga alipores, ang AFP/PNP ug ang Citizen Armed Force Geographical Unit (CAFGU).

Ang Communist Party of the Philippines (CPP) sa Negros, ang New People's Army (NPA) ug ang NDFP nagpadayag sa ilang kaablihon sa peace talks nga muhatag og kasulbaran sa mga ugat sa armadong komplikto. Ang mga mainantuson nga pangingkamot sa mga milabay

nga GRP-NDFP peace panel nakamugna sa Comprehensive Agreement on Respect for Human Rights and International Humanitarian Law (CARHRIHL) ug nakahimo na og unang mga tikang alang sa deliberasyon sa ilang tag-sa-tagsa nga mga burador sa CASER. Ang pagbalik sa panaghisgut-hisgot nga nakabase sa nasabutan nga mga prinsipyo usa ka hinanaling katuyuan.

Among gipanawagan sa tanang Negrosanon nga mahigugma-on sa kalinaw ug tanang Pilipino nga naghandum sa tinuod nga kalinaw nga mag-organisa og mga pampublikong panaghisgut, mga serye sa lektur, halapad nga mga diskusyon tali sa pundok sa mga negosyante, sa mga eskwelahan, sa medya, mga taga-simbahan ug mga propesyunal aron mapalalaman ang ilang pagsabot ug, isip resulta, moduso sa pagpatuman sa CARHRIHL ug pagpinalisa sa burador sa CASER sa miaging mga negosyador sa GRP ug NDFP. Ang burador sa CASER usa sa mga yabe sa tinuod, maki-angayon ug malahutayong kalinaw sa isla sa Negros ug sa tibuk Pilipinas. Ang ubang tipo sa mini ug pakarong-ingnon

nga pagpanday sa kalinaw dili makalingla sa rebolusyonaryong pwersa sa isla aron mo-surender.

Ato usab gipanawagan ang ubang nalamdagang elemento sa AFP, PNP ug CAFGU nga balibaran ang mga dili tawhanong kamanduan gikan sa inyong mga pasista ug mersenaryong opisyaes. Mayoriya kaninyo gikan sa han-ay sa mga nilupigan ug gihimuslan sa atong katilingban. Ayaw og patuo sa mga uhaw sa dugo ug hangul sa gubat nga mga opisyal; dako ang among paglaum nga sa umaabot inyong pili-on ang pagsukol sa inyohang mga tiranikong agalon aron inyong tinuoray nga maalagaan ang katawhang Pilipino.

Bisan unsang klase sa task force (mapa-nasyunal, rehiyunal, probinsyal o lokal man) nga nagtumong nga hunungon ang komunistang armadong komplikto dili makahatag og kalinaw sa napuno na sa kagubot nga isla sa Negros. Ang full-spectrum military dominance gipatuman na sa mga task force nga gilunsad. Pagra-behon lamang niini ang mga pagpatay sa mga gigutom ug wala'y yuta nga mag-uuma ug mamumuo sa uma-





han nga nakigbisog para sa ilang katungod nga musikad aron mabuhi, ug lakip na usab ang tanang Negrosanon nga gihinganlan isip mga tigpaluyo sa rebolusyonaryong kalihukan. Kini mas makapagrabe sa mala-demonyong Sauron-style nga mga pagpatay sa mga inosenteng Negrosanon sa kamut sa mga uhaw sa dugo ug kriminal nga AFP ug PNP. Kini kinahanglang makita ug masabtan sa mga matarung nga mga opisyal sa lokal nga panggamhanan nga gihulga sa militar ug kapulisan.

Sila BGen. Vinoya, BGen. Arevalo, Col. Baluyan ug ang PNP ang pinakama-ayong tig-agni sa katawhan para sa makatarunganon nga kawsa sa CPP/NPA! Tungod sa ilang wala'y gamit, hamubo nga panlantaw, reaksyunaryo ug kontra-rebolusyonaryong grandioso nga iskema ug ang ilang hambog nga pagpakita og gahum ug superyoridad militar, daghang mga biktima sa inhustisya gikan sa pagpamatay ug dungan-dungan nga pag-aresto panahon sa Sauron nga nidangop sa NPA sa ilang pagpangita sa hustisya ug mainitong nipaluyo ug nisalmot sa nagsulong

nga gubat sa katawhan sa NPA ug katawhan nga gipanguluhan sa CPP.

Among pahimangno kanila BGen. Vinoya, BGen. Arevalo, Col. Baluyan ug sa kinatibuk-ang puwersa sa AFP ug PNP: ang CPP-NPA ug ang NDFP sa isla sa Negros wala mahulga sa inyong gipanghambog nga gubat. Ang Oplan Kapanatagan sa AFP/PNP, whole-of-nation approach pinaagi sa Task Force to End Local Communist Armed Conflict nga nagpatuman og full-spectrum dominance magmugna lamang og dugang pagdanak sa dugo sa mga linupigan ug gihimuslang Negrosanon. Samtang wala'y hunong nga nag-agas ang dugo sa mga nakiglimbasug nga mga mag-uuma ug mamumuo sa umahan sukad pa niadtong daw demonyo nga masaker sa Sagay ug extrahudisyal nga mga pagpatay ug sa nagpadayon nga daw satanas nga serye sa dinaghan nga pagpatay, abundant mo-baha ang dugo nga molumos sa mga manlulupig, mapahimuslanon, ug tuman ka kontra-mag-uuma, kontra-mamumuo sa umahan ug kontra-katawhang nagharing hut-ong sa isla.

Among sinsero nga pangutana sa mga Negrosanon: sa inyong kasing-kasing, nagtuo ba gyud kamo nga ang Oplan Kapanatagan ug ang National Task Force to End Local Communist Armed Conflict ni Duterte sa Isla makasulbad sa ugat sa armadong komplikto?

Motuo ba kamo nga ang localized peace talks nga nagduso sa pagsurender sa mga puwersa sa CPP-NPA ug NDFP sa Negros makapatumang og epektibong solusyon?

Nasayod kami nga aduna kamo'y maalamon nga tubag. Apan para sa kadtong mga dili asegurado, tan-awa pagbalik ang kasaysayan sa pakigbisog sa Negros.

Barug, mga Negrosanon! Duyugi ang mga awit sa atong mga bayani, mga maisug nga manggugubat sa kagawasan ug militanteng katawhan nga naglunsad og pakigbisog sa Negros! Atong kolektibong isulong ang maki-angayong gubat sa katawhan aron makab-ot ang tinuod nga demokrasya, nasudnong kalingkawasan ug usa ka maki-angayon, tinuod ug malahutayon nga kalinaw sa isla sa Negros ug sa tibuok nasud!

***Kinasingkasing nga nag-alagad sa katawhan,***

**REHIYONAL NGA KOMITE SA PARTIDO SA ISLA SA NEGROS  
PARTIDO KOMUNISTA SA PILIPINAS**

